

Editoryal: ERAP KONTRA SA MAHIRAP

Sa Hunyo 30, magabulos na si Joseph (Erap) Estrada kay Heneral Fidel (Viajero) Ramos bilang presidente sang papet nga republika sang Filipinas. Sa subong nga nagagrabe na gid ang krisis, indi malikawan sang pumuluyo ang maglaum nga ayhan mahaw-as na sila sang bag-o nga rehimen sa kapigaduhon.

Apang isa gid lang ini ka mapait nga damgo sa udto-adlaw. Kag ngaa?

Nagsubli sa programa ni Ramos

Ano pa ang lauman nila kay kon usisaon naton, si Estrada halos nagsubli man lang sa mapanghimulos kag mapiguson nga mga polisiya sang rehimen US-Ramos. Pagkatapos gid lang maproklamar siya nga bag-ong pangulo, wala panabon-tabon nga ginpanug-an niya nga hugot ipatuman ang mga dikta sang IMF-WB-WTO kag iban pa nga ahensya sang mga imperyalista. Ini paagi sa pagpadayon sang mga polisiya sang denasyunalisasyon, deregulasyon, import liberalisasyon kag pribatisasyon.

Maathag nga makita ini naton sa masunod nga mga tikang ni Estrada sa mga isyu:

- Sa una nga isa ka gatos ka adlaw sang iya pagdumalahan igapribatisa ang mga nabilin nga mga korporasyon nga ginapanag-iyahan ukon ginakontrol sang gubyrno. Gilayon nga igabaligya sa mga kapitalista ang *Philippine National Bank* (PNB) kag *National Power Corporation* (Napocor).
- Naghipos lang siya samtang makaduha ka beses na nga nagpasaka sang presyo sa langis ang imperyalistang kumpanya sang Shell, Caltex kag Petron sadtong Mayo 16 kag Hunyo 3.
- Nagapadungol lang siya sa mabaskog nga demanda sang mga estudyante nga pungan ang panibag-o nga pagtaas sang balayran sa twisyon kag matrikula sa mga

kolehiyo kag unibersidad (halin sa 10 asta 20 porsyento).

- Wala man siya magkomentar, magpromisa nga lubaron ang problema sang mga empleyado, ukon bisan magsaway man lang sa manedsment sang *Philippine Airlines* (PAL) nga basta lang nagsipa sang 600 ka mga piloto kag 5,000 nga mga empleyado sini.
- Pabor gid katama si Estrada sa *Foreign Investment Incentives Act*. Ang hagna nga ini nagahatag prebelihiyo sa mga dumuluong nga magpanag-iyang sang kadutaan sa Filipinas sa sulod sang 50 tuhtub 75 anyos!
- Dugang pa, baliskad sa iya anti-base nga tindog, ginaduso ni Estrada ang ratipikasyon sang senado sa *Visiting Forces Act* (VFA). Kon maaprubahan, ang bug-os nga Filipinas bangin base militar liwat sang gubyrnong US.

Karon, magalaum pa bala ang malapad nga masa sang pumuluyo nga si “Erap para sa mahirap”?

Pagbanhaw sang pasistang diktaduryang Marcos

Sa pagsarurot sang ekonomiya sang pungsod sa mas madalom nga kutkot sini, nagamakot man ang diskontento sang pumuluyo. Kabangdanan nga wala pa gani makapungko sa Malacanang si Estrada, ginasugata na siya sang nagabaha nga reklamo kag mga demanda, kag sang nagalapad nga pag-alsa sang halos tanan nga sektor sang pumuluyo. Resulta sini, ang manipis nga dekorasyon sang repor-mismo nagakakakas kag labi nga nagapasingki ang militarisasyon indi lang sa kaumhan kundi sa kasyudaran man.

Subong pa lang, nagaathag na ang senyales sang pagpanumbalik sang pasista nga diktaduryang Marcos. Kag indi ini katingalahan. Kon si Ramos kuno nagdis-tansya pa sa anay agalon niya nga si

Diktador Marcos, si Estrada baraghal kag hayagan nga nagapakita sang iya tunay nga kolor: isa ka masupog nga Marcos loyalista.

Insigida pagdaug niya, ginmandu ni Estrada ang pagpalubong sang bangkay ni Marcos sa *“Libingan ng mga Bayani”* sa daku nga pag-insulto kag labaw nga kaakig sang mayorya nga pumuluyo. Madason sini, ginpalutaw man niya ang opinyon nga dapat ibale-wala na ang mga kaso kriminal batuk kay Imelda Marcos. Sa subong, halos nagadominar na sa magapungko nga gubyerno ni Estrada ang mabaskog nga impluwensya sang mga kroni ni Marcos.

Kag sanday sin-o ining mga kroni sang Diktador?

Sila, magluwas kay Imelda Marcos kag pamilya sini, amo sanday Danding Cojuangco, Lucio Tan, anay mga Senador Tolentino, Angara, Maceda kag Enrile, anay Primer Ministro Virata, anay Embahador Benedicto, anay Assemblyman Pacificador, Cong. Ronald Zamora, Senador Blas Ople kag Senador Franklin Drilon, kag ang mga loyalista nga heneral kag koronel sang militarya kag pulisya.

Lab-as pa sa pamensaron nga ining mga kroni durante sang ila 14 anyos nga paghari nagdulot sang indi masaysay nga kahalitan indi lang sa pila ka pulo ka libo nga direktang biktima sang layi militar kundi sa minilyon nga pumuluyong Filipino.

Ang pagkabanhaw sang diktaduryang Marcos pwede gid nga matabo sa desperado nga reaksyon sang rehimeng US-Estrada. Lohikal lang ini nga layi sang kasaysayan samtang ginabunalan sang labing malala nga krisis ang nagaharing sistema kag ginadugangan man sang nagapagsik nga pagsulong sang armadong rebolusyonaryong kahublagan.

### **Ano ang aton Pagahimuon?**

Ang kahimtangan pangpulitika paborable gid katama subong para sa makahason nga palaparon kag pabaskugon naton ang nanari-sari nga porma kag pamaagi sang rebolusyonaryong paghimakas sa kaumhan kag kasyudaran. Sa sini ang Partido Komunista sang Filipinas maathag nga nagtumod sa aton sang malahalón nga mga hilikuton.

1. Kinahanglan mapangahas nga abuton kag pahulugon naton ang malapad nga masa sang pumuluyo kag malig-on nga pamunuan ang ila anti-imperyalista, anti-pyudal kag antipasista nga kahublagan.

Kinahanglan maglunsar kita sang nagalpad kag nagapadaku nga mga aksyong protesta kag paghimakas pangmasa sa kaumhan kag sa kasyudaran.

2. Kinahanglan hingalitan naton ang sitwasyon agud papagsikon ang pagpakig-away gerilya sa bug-os nga pungsod. Partikular sa Panay, nagakadapat lamang nga ang mga aksyong protesta kag paghimakas pangmasa sa kasyudaran kag kaumhan pagatimbangan man sang mga taktikal nga opensiba kag aksyon militar sang mga yunit sang New People's Army nga pat-ud nila masarangan kag mapadaug.

Ang hugot nga pagpatuman sining memorandum sang Partido epektibo nga magasabat sa mabaskog nga demanda sang malapad nga pumuluyo.

Sa sini lamang napukaw, naorganisa kag napahulag naton ang minilyon nga pumuluyong Filipino tubtub marumpag ang ginakangil-aran nga diktaduryang US-Marcos sang 1986. Sa sini man nga pamaagi aton aktibo nga atubangon kag paslawon ang pagpanumbalik sang pasistang diktadurya nga mahimo tukuron sang bag-o nga rehimen ni Estrada. ★

## **ARESTUHON: -**

### ***IMELDA, BONGBONG MARCOS!***

Nagmandu sang Hunyo 15 ang Komite Sentral sang Partido Komunista sang Filipinas (PKF) sa tanan nga katapu kag yunit sang New People's Army (NPA) sa bilog nga kapuluan nga dakpon sanday anay Unang Ginang Imelda Romualdez Marcos kag iya magulang nga anak, Gobernador Ferdinand (Bongbong) Marcos, Jr. bangud sa ila mga krimen sa pumuluyong Filipino.

Ini nga order sa NPA ginkumpirmar ni Gregorio Rosal (Ka Roger), ang tagpamaba sang PKF sa radyo interbyu sang dzRH sang Hunyo 22. Suno sa iya, kadungan sa pagpapanaog sang mandamyento de aresto sa magiloy Marcos gintukod man ang mga espesyal nga yunit nga magalunsar sang mga operasyon partisano sa katumanan sang madugay na ginademanda nga rebolusyonaryong hustisya.

Gin-athag ni Ka Roger nga sa subong sanday Imelda kag Bongbong Marcos pa lang ang ginhingadlan nga arestuhon kag ipaatubang sa

espesyal nga Hukmanan sang Pumuluyo. Ginatun-an pa sang mataas nga pamunuan sang Partido kon sanday sin-o nga mga kroni sang diktador ang pagadakpon kag silutan. ★

## NAGAPAGSIK ANG HUBLAG MANGUNGUMA

**N**agakaguba na gid ang pangabuhian sang mga mangunguma sa Panay kaangay man sa iban nga bahin sang pungsod. Ang peste nga tag-guba sini walay liwan kundi ang rehimeng US-Ramos.

### Halit nga mga layi

Klaro ang hungod nga pagpabaya sang rehimen sa atrasado nga kahim-tangan sang kaumhan. Ang mga polisiya sini, nga pat-ud nga padayunon sang bag-o nga rehimen ni Estrada, lunsay kaha-litan sa mga mangunguma kag langit naman sa mga agalon nga mayduta-kumprador ilabi na sa mga dumuluong nga kapitalista.

Maathag ini sa *Comprehensive Agrarian Reform Law* (CARL). Nagsukat na ini sang 10 anyos sining Hunyo 10, apang wala gid katumanan sa madugay na nga handum sang mga mangunguma. Tigaylo, may mga agalon nga nakapang-agaw pa sang malagpad nga kadutaan. Ginkumbertir nila ini sa mga subdibisyon, pangturismo, para sa pang-eksport nga pananom lakip ang mga komersyal nga kakahuyan agud ini matandog sang CARL. Madamo sang mga mangunguma kag tumandok ang sa katalagman nga matabog sa ila kadutaan kon magbwelo na ang *Mining Act of 1995* nga nagapa-bor gid lang sa mga dumuluong nga kapitalista sang minahan.

Ang mga polisiya sang *deregulasyon* kag *pribatisasyon* nagdula sang mga serbisyo nga kinahanglanon sang mga mangunguma. Ginkuha ang subsidyo sa NFA gani wala ini sang kwarta sa pagbakal sa mas mataas nga presyo kag madamo nga mga paray sa mga mangu-nguma. Nagapabor ini sa mga dalagku nga kapitalista kag *kartel* sang bugas pareho kanday Florete, Uygongco, Tan kag Hao sa Visayas kag Mindanao.

### Halit sang El Nino.

Ang daku nga halit sining kalamidad nagapalala pa gid sa malaut nga kahimtangan sang mga mangunguma kag

mamumugon sa uma. Tama kadamo ang wala makatanom sang paray kag mais. *Ubi, banayan*, kag bisan ang makahililo

nga *kayos* ang ginakaon na sang mga mangunguma resulta sang gutom. Lap-nagon ang mga balatian ilabi na sa kabataan. Kon ngaa amo sini kadaku sang kahalitan sang El Nino bangud sa kainutil sang gubyrno sa paghatag sang kinahanglanon nga ayuda sang pag-dunggo sang kalamidad.

Tigaylo magtabang paagi sa paghatag kapital para sa subong nga tigtalanom, pinabay-an lang sang rehimeng Ramos ang sunod-sunod kag patraidor nga pagpataas sang mga presyo sa langis. Nagwaldas pa gid ini sang minilyon ka pisos sa magarbo nga pagsaulog sang sentenaryo sang kahilwayan batuk sa Katsila sang Hunyo 12.

### Aksyon-protesta.

Sa sining kahimtangan nila, matarung lamang para sa mga mangunguma, mamumugon sa uma kag mangingisda nga magduso sang mga aksyon protesta kag kahublagang pang-masa sa Iloilo, Capiz, Antique kag Aklan para sa gilayon nga mga demanda nila.

Sang Hunyo 10, mga 400 ka mga mangunguma kag mangingisda sa idalom sang *Federation of Iloilo Farmers' Association* (FIFA) ang naglunsar sang aksyon protesta sa Iloilo City kag ginsulod ang opisina sang gobernador. Ginpresentar nila kay Gob. Defensor ang ginademanda nga mga bulig sa ila-- *bugas, binhi* kag *bulong* sa pamalatian. Napilitan magpromisa si Gob. Defensor pagkatapos sang isa ka oras nga pagdayalog sa mga mangunguma sa iya.

Bitbit ang mga plakard, ginsulod man sang mga mangunguma sa Tacas kag Lanit sang distrito sang Jaro, ang *City Hall* sang Iloilo sang Hunyo 16. Ginpresentar man nila ang kaangay nga demanda sang ayuda nga nahamtang sa ginbilin nga mga plakard sa konseho sang syudad.

Nagalibod man ang pagpirma-petisyon sang linibo ka mga mangunguma kag mamumugon sa uma sa nagkalain-lain nga kabanwahanan sang Panay. Ini nagasukot sa mga lokal nga opisyal sang gubyrno sang ila mga pinanug-an sang nagligad nga eleksyon.

Pila lang ini sa mga aksyon pangmasa nga nagaluntad sa padayon nga paglala sang krisis. Kinahanglan pa ang dugang nga pagpapagsik sang rebolusyonaryo nga kahublagang masa sa kaumhan agud maangkon sang mga mangunguma kag

mamumugon sa uma ang ila panggilayon nga demanda. Labi sa tanan, kinahanglan pa nila lubaron ang pundamental nga problema sang pagkawalay kaugalingon nga duta.

Indi makalaum ang mga mangunguma kag mamumugon sa uma nga simple lang ihatag sa ila ang kadutaan sang mga agalon kag sang rehimeng US-Estrada. Ila lang maagum ang matuod-tuod nga reporma sa duta paagi sa paghugpong sang kusog kag pag-usoy sang armado nga rebolusyonaryo nga banas. ★

## “PEACE AWARD” KUNO PARA SA BERDUGO

**N**agbyahe sa pungsod Senegal (kontinente sang Aprika) si Hen. Ramos sining Hunyo. Batunon niya didto ang “*peace award*” nga ihatag sang UNESCO (*United Nations Educational, Scientific and Cultural Organization*) bilang tagsakdag si Ramos sang “kalinungan”.

Natural. Ang mga imperyalista kag nagaharing sahi nagapasidungog sa Heneral sa tampad sini nga pag-alagad sa ila interes kag pagkontra sa interes sang pumuluyo.

Indi tampad si Ramos para sa kalinungan kag paglubad sang mga problema sang pumuluyong Filipino. Halimbawa lang sa aktwal nga negosasyon sa tunga sang Gubyrno sang Filipinas (GRP) kag *National Democratic Front-Philippines* (NDFP). Makapila ka beses nga nag-atras-abante kag nag-lapas sa kasugtanan ang GRP.

Sining Marso 16, ginlagdaan sang panel sang GRP kag NDFP ang naabot nila nga *Kumprehensibo nga Kasugtanan sa Pagrespeto sa mga Tawhanon nga Kinamatarung kag Internayunal nga Tawhanon nga Layi*. Ginpirmahan na ini ni Kaupod Mariano Orosa, pangulo sang NDFP sadtong Abril 10, 1998. Ining kasugtanan makabulig sang daku sa pumuluyo. Ugaling indi ini mapatuman nga kasugtanan bangud indi magpirma si Hen. Ramos.

Agud ipakita ang salimpapaw nga pagpostura para sa kalinungan, nagdeklarar ang rehimen sang iya pagpauntat sang operasyon militar sa sulod sang tatlo

ka bulan sugod Abril 1. Apang nagapadayon sa gihapon ang kampanya kag operasyon militar sa bug-os nga pungsod. Pormal gani nga ginkuha sang Philippine Army (PA) ang pagpanguna na sa kontra-insureksyon halin sa Philippine National Police (PNP).

### Padayon nga militarisasyon.

Sa Panay, wala nag-untat ang militarisasyon. Ginamentinar kag ginapalig-on ang mga yunit sang CAGU kag armado nga CVO. Wala untat ang pagrekluta kag paghanas para sa mga opisyal kag tropa sang PA ang 3rd Infantry Spearhead Division sa Kampo Peralta, Jamindan, Capiz para sa kontra-insureksyon nga padihut. Ara ang 12th IBPA sa Antique kag Aklan, 6th IBPA sa bahin sang Capiz, kag sa Iloilo, ang 7th IBPA. Ginatimbangan ang mga ini sang pwersa sang PNP.

Sa idalom sang kontra-insureksyon nga “*Oplan Unlad Bayan*”, nagalunsar sila sang mga kampanya kag operasyon militar nga ginaupdan sang “pabuot-buot” sang mga tropa. Nagabulig-bulig kuno sila sa masa kag nagahiwat sang ALPS (*Army Literacy Patrol System*). Bangd kinaiya nga garuk ang oryentasyon, nagaguwa ang matuod-tuod nga kolor nila bilang mga pasista kag nagapanguna nga armas sang rehimeng US-Ramos kontra sa pumuluyo.

Halin sadtong Nobyembre 1997 asta subong, wala untat ang ila operasyon militar kada bulan sa nagkalain-lain nga lugar sa Panay. Ini sa platun asta kum-

panya-kadaku nga pwersa nga ginabuy-lugan sang mga PNP kag CAFGU.

Sa nareport lang nga mga kaso, ara ang pagpamahug kag pagpang-abuso sa mga pumuluyo, pagpalapnag sang anti-sosyal nga gawi, pagpangawat sang baboy, manok, idu kag iban pa, sa gina-gutom nga mangunguma. Matuod ini sa kabaryuhanan nga sakop sang Miag-ao, Igbaras, San Remigio, Sibalom, Maasin, Leon, Tapaz, Jamindan, Sebaste, Culasi, Nabas, Ibajay.

Ang mga pumuluyo sa kabaryuhanan sa palibot sang Kampo Peralta ginaki-bang

## BALITA\*BALITA

### Pumuluyo Nag-armas Batuk sa Contrás

Sobra na! Tapnaon na! Pamat-ud sang mga pumu-luyo sa isa ka mabukid nga baryo sang Ibajay, Aklan batuk sa mga mapang-abuso nga Contrás.

Suno sa report ni Rebo lwag, koresponsal sang *Jimmy Marfil Command-North-ern Front*, isa ka hubon sang kontra-rebolusyonaryo sa pagpamuno ni alyas Boyet nagkadto sa binayle sang gab-i sang Abril 5. Hubog sila nga tatlo kag nagapa-kiwal sang ila mga pusil pareho man sa mga berdugo nga militar. Sang ang duha ka taga-baryo (nga hubog man) nagbaisay, nag-entra si Boyet. Wala siya ginasapak. Sang ulihi, nagpi-nalupok siya sa baylehan-- ang ma-sami nga ginabuhat nila agud pahugon ang mga pumuluyo.

Apang hinali lang nga bumalos man palupok ang duha ka hubog. Dugay-

dugay nag-upod na sila sa iban nga pumuluyo nga amado man. Malapit sa 30 minutos ang pagbayluhanay sang mga lupok sa tunga sang mga Contrás kag pumuluyo.

sa adlaw-gab-i nga pagpalupok sang bomba, kapin sadtong paghanas sang 61st IBPA. Padayon ang pwersado nga pagpaebakwet sa mga mangunguma agud makapadayon sila sa pagtesting sang mga armas kag mortar. Ang malain pa kay madamo sang mga bomba ang nagtupa sa ulumhan kag naghalit sang daku.

Gin-istraping sang mga tropa sang 12th IBPA ang tyangge sa Alegre, Sebaste, Antique. Napatay ang isa ka sibilyan kag isa ka PA kag pilason ang tatlo pa ka sibil-yan. Natabo ini sang Pebrero 1998 sam-tang ara ang mga tropa sa ila operasyon.★

Pagkaaga, nagkadto sa baryo si Daniel Batoy (alyas Mokong, Arlene) kag nagpa-

tawag sang miting. Ginpa-andaman niya ang pumuluyo nga kon magbato pa liwat sila, pagakuhaon sang Con-tras ang ila nga armas.

Wala malingkang ang taga-baryo. Matigdas nga ginsabat nila si Mokong: Tilawan ninyo nga kuhaon kay malupad man ang inyo mga ulo!

Daw napus-an lang sang ila mga itlog ang mga Con-tras sa atubang sang naga-balingaso sa kaakig nga mga pumuluyo.

Samtang sa Southern Front, ang Contrás nangin masupog nga mga armadong buyong sang mga pulitiko. Suno sa report sang Napoleon Tumagtang Com-mand, aktibo sila sa pila ka

banwa sang primer kag segundo distrito kongres-yunal sang Iloilo bilang mga badigard sang mga aspirante sa pagkakongresman kag meyor.

Sa Miag-ao halos nagabu-ligay sila sa mga tropa sang 7th IBPA, samtang sa Leon kag Tubungan, updanay sila sang mga “*rebel returnees*” sang “*Balikatan*” sa pagpa-mahog sa mga elektor. ★

**Padayunon  
ang Paghimakas  
para sa Kahilwayan!**

Sa panawagan nga “Pada-yunon ang paghimakas para sa tunay nga kahilwa-yan,” nagmartsa sa karsadahon sang Iloilo City, Hunyo 10, ang mga katapu sang Iglesia Filipina Independiente (IFI), Bayan-Panay kag mga mili-tante nga alyado nga orga-nisasyon sini sa pagsaulog sang Sentenaryo sang Kahilwayan.

Isa sa mga bisita nga nag-upod sa masobra 3,000 nga nagmartsa-rali sa Freedom Grandstand amo si Kaupod Coni Ledesma, katapu sang NDF *Negotiating Panel*. Siling ni Ledesma, ang negosasyon pangkalinungan isa ka pamaagi sa pag-angkon sang tunay nga kahilwayan sang pumulu-yong Filipino halin sa gapos sang imperyalismong US, burukrata kapitalismo kag pyudalismo. Sa gihapon ang armadong paghimakas amo

ang pangunahon sa pag-husga sa kon ano ang madangtan sa negosasyon pangkalinungan.

Ang Liturgical-Cultural Assembly sang IFI nga ginhiwat sa koordinasyon sang Promotion of Church’s Peo-ples’ Response (PCPR) nagawagayway sang mga pulang bandera, mga ban-ner, plakard samtang naga-lanog ang mga ambahanon nga makibanwahanon kag islogan, “KKK Ipadayon!” ★

Nagakaon *banayan* kag *ka-yos* ang mga mangunguma sa grabe na nga gutom. Pero P12 milyones ang gastuhon sa inagurasyon ni Erap sa Hunyo 30. Mapyesta sila sang 200, 000 manok kag 5,000 litson nga baboy. Badyet ini halin sa balhas sang masa. *Erap na-gapagusa sa kinabudlayan sang mga mahirap!*

=====

Sa P879,311,735 nga halit sang El Nino sa isla (manubo ini nga tantya), ahaw P8 milyones ang gin-alokar sang probinsya sang Iloilo sa kalamidad. Pero P17 milyones *pa-ra lang* sa mga palupok (*fire-works*) sang Hunyo 12 ang gasto sang rehimen.

=====

Si Hen. Ramos kag Cory Aquino ang duha sa mga ad-bayser ni Erap. Si Ramos ma-adbays nga wala sang indus-triyalisasyon pareho sang iya *Pilipinas 2000*; si Cory, wala sang reporma sa duta pareho sang iya *CARP*.

=====

100,000 asta 20,000 ka pamatan-on sa isla ang indi makabutho sa hayskol kag kolehiyo kay dugang nagtaas ang balayran sa mga eskwelahan. Supermarket man ang mga buluthuan. Kon may kwarta ka, makabakal ka kurso nga gusto mo.

=====

Pito pa ka komunidad sa Iloilo City ang idemolis sining Hunyo. Dugang pa ini sa 20 komunidad nga nademolis na sa sulod sang nagligad nga tatlo ka tuig nga nag-apekto sa 3,000 ka mga pamilya. Man, para kuno ini sa “pag-debelopar sang syudad”. Ano nga “debelopment” ang gina-ngasal sang gubyrno? Mas-kin ang mga kasarangan nga kapitalista sa *real estate* na-gawangal subong sa krisis!

=====

Sang Hunyo 15, ginpaat-rasar lang anay ang *ikatlo na*

nga pagsala sa presyo sang langis sugod matapos ang eleksyon. Wala na makapang-hibalo ang banwa, nagasagirit na ang presyo sang tanan nga balaklon. Wala na batia sila ni Drilon, Raul Gonzales kag iban pa, kon ano ang mahambal nila sa “kaayuhan” sang deregulasyon sang industriya sa langis para sa banwa.

=====

Nagmandu si Ramos nga hugton ang siguridad nanday Imelda kay arestuhon sila sang NPA. Nabalaka man ang mga tawo-tawo sang hubon Estrada, pareho kay Roco. Apin sila sa mga Marcoses sangsa ihatag ang hustiya sa mga biktima sang ginbagsak nga diktadurya. Hambal ni Mal-am Juan: “*kay mga kroni sila!*”

=====